

Date	5 November 2012
Title	Semangat kejar ijazah
Publication	Harian Metro
Page	15

Semangat kejar ijazah

Pelajar kurang upaya akibat kemalangan 10 tahun lalu capai impian selepas pengajian tertinggal 6 tahun

>>Oleh Rizanizam Abdul Hamid
mrizanizam@hmetro.com.my

BANGI: "Bukan mudah untuk menerima kecacatan diri selepas terbabit kemalangan 10 tahun lalu, apatah lagi pernah merasai kehidupan manusia normal selama 19 tahun.

"Namun saya reda dan melupakan itu semua demi mahu menggenggam segulung ijazah," kata Nor Azizi Zulkifli, 29, selepas istiadat Konvokesyen Ke-15 Universiti Tenaga Nasional (Uniten) di sini, semalam.

Nor Azizi yang lumpuh separuh badan akibat kecederaan pada saraf tunjang adalah seorang daripada 1,200 graduan yang menerima skrol sarjana dan sarjana muda pada hari kedua konvokesyen itu.

Graduan Sarjana Muda Kejuruteraan Mekanikal (Kepu-



GEMBIRA...Nor Azizi dicium ibu bapanya selepas menerima ijazah.

FOTO | Mohd Asyraf Sawal

jian) yang memperoleh Purata Nilai Gred Kumulatif (CGPA) 3.59 itu berkata, dia lega dan gembira dapat menamatkan pengajiannya walaupun memerlukan masa 11 tahun.

"Selepas setahun memasuki Uniten, saya terbabit kemalangan jalan raya pada 9 Ogos 2002 dan lumpuh separuh badan menyebabkan terpaksa menanggung pengajian enam tahun untuk menjalani fisioterapi.

"Selepas keadaan bertambah baik, saya nekad mahu meneruskan pengajian kerana mahu membuktikan terbaring di katil bukanlah penamat hidup kepada orang kurang upaya (OKU), sebaliknya juga mampu berjaya seperti manusia normal yang lain" katanya.

Saat manis itu dikongsi bersama ibu bapanya, Noriah Husin, 54, dan Zulkifli Ishak, 53, yang datang dari Pulau Pinang. Ditanya bagaimana dia

menghadiri kuliah dengan berkerusi roda, anak sulung daripada tiga beradik itu berkata, dia bersyukur ibu bapanya menyediakan pembantu rumah.

"Ini memudahkan urusan saya ke mana saja, namun saya perlu bekerja lebih keras untuk belajar, contohnya kalau kawan belajar selama satu jam, saya perlukan dua atau tiga jam," katanya yang berhasrat menyambung pelajaran ke peringkat sarjana selepas ini.

Mengimbas kemalangan menimpa dirinya 10 tahun lalu, Nor Azizi berkata, kereta dipandu arwah rakannya terbabas dan merempuh pokok mengakibatkan dia tercampak melalui cermin belakang.

Akibatnya, Nor Azizi berada dalam koma selama empat hari dan doktor mengesahkan kecederaan pada saraf tunjang dialami mungkin menyebabkannya lumpuh seumur hidup.